

GÁLATAS

Pablo Galacia nikú marîrê ôadoredea

1 ¹⁻² Yû Pablo, âârîpererâ marîyarâ yû merâ âârîrâ merâ musârê Galacia nikûgue âârîrâre Jesúre buremurârê ôadore, gojáa. Jesucristo yûre îgûyare buedoregu beyepîmi. Irasû âârîmakû, Marîpu îgûrê boadiguere masûdi yûre pídi âârîmî, îgû magûyare bueburo, ârigû. Masaka yûre beyepîbirima. ³ Marîpu âârîngû, marî Opû Jesucristo musârê ôârô iritamû, siuñajârî merâ âârîrikumakû iriburo. ⁴ Jesucristo, Marîpu gâamederosûta irîgu, îgû basi marî ñerî iridea waja boabosadî âârîmî, i ñmû marâ ñerî irirâ irirosû irinemobirikôâburo, ârigû. ⁵ Irasirirâ ñmurikû Marîpure: “Ôâtaria mû”, ârî, usuyari sínîkôârâ! Irasûta irirâ!

**Cristo sugûta marîrê taugû
âârîmî, ârî gojajadea**

⁶ Marîpu musârê maîgû, Cristore buremunûgâdoregu siudi âârîmî musârê peamegue waabonerârê taubu. Musâ gapû, îgû irasirikerepuru, matagora îgû Cristo merâ masakare tauri kerere buremuduúrâ irikoa. Gaji bueri gapure tûyakoa. Musâ irasiririre pégu, bûro pégukáa. ⁷ Gajerâ musârê, musâ Cristoya kerere buremunûgâdeare buremuduúdererâ: “Gaji âârâ marîrê tauri kere”, ârigato, werema. Marîrê gaji tauri kere máa. Cristore buremurî merâta marî tarimasîa. ⁸ Gûa musârê Marîpu Cristo merâ marîrê tauri kerere werebû. “Gaji âârâ marîrê tauri kere”, ârigato, wererârê Marîpu bûro wajamoâburo. Yû, o Marîpure wereboegu ñmûgasiguemû musârê irasû ârigato, weremakûdere

wajamoâburo. ⁹ Musârê ire weresiabu. Weredi âârîkeregu, dupaturi musârê werenemoduakoa doja. Sugu, gûa Marîpu Cristo merâ marîrê tauri kerere musârê weredeare: “Diaye âârîbea, gaji âârâ marîrê tauri kere”, ârigato, weremakû, Marîpu îgûrê peregûri peamegue wajamoâburo.

¹⁰ Yû ire weregu, Marîpu gâamerôsûta buea. Masaka yûre: “Ôârô weremi”, âridoregu meta buea. Irasû âridoregu tamerâ Cristoyare iribiribokoa. Îgûrê moâboegu meta âârîbokoa.

**Pablo: “Jesucristoya kerere
weredoregu Marîpu yûre
pîmi”, ârî werede**

¹¹ Yaarâ, musârê ire masîmakû gâamea. Yû musârê Marîpu Cristo merâ marîrê tauri kerere bueri, masaka îgûsâ basi îgûsâ gûñarî merâ bueri meta âârâ. ¹² Irî kerere neô sugu masakû yûre werebirimi. Neô sugu masakû yûre irire buebirimi. Jesucristo îgû basi yûre irire masîmakû irimi.

¹³ Musâ, yû iripoegue judío masaka îgûsâ buremurîrê iririkudeare péunakuyo. Yû Marîpuyarârê Jesúre buremurârê ñerô iridûari merâ îgûsarê bûro îaturitûyauabu. Îgûsâ Jesúre buremurîrê peoduagu irasiriunabu.

¹⁴ Yû, judío masaka îgûsâ buremurîrê ôârô iririkûunakubû. Gajerâ, yû merâmarâ nemorô gûa ñekûsamarâ iririkûunadeare iritarinûgâunakubû.

¹⁵ Yû irasiririkukerepuru, Marîpu, yû deyoaburi dupuyuro yûre beyesidî âârîmî îgûyagu âârîburo, ârigû. Irasirigu îgû yûre bûro maîrî merâ îgû gâamerôsûta iridoregu siiumi. ¹⁶ Îgû irasiriderosûta keoro îgû magûrê

yure masímakū irimi, judío masaka āārimerārē igū magū merā igūsārē tauri kerere weredoregū. I yure irasū waadero puru, gajerārē: “¿Nasirigukuri yu?” āri sérēnagū waabiribu. ¹⁷Jerusalégue āārírārē Jesucristo yu dupuyuro igūyare buedoregū beyepínerādere sérēnagū waabiribu. Ubu gapu Arabia nikūgue diaye waakōābu. Puru Damasco goeduájābu doja.

¹⁸Ure bojori tariadero puru, Jerusalégue Pedroe iāgū waabu. Pe semanata igū merā āārībú. ¹⁹Irogue āārīgú, gajerā Jesucristo igūyare buedoregū beyepínerārē neō iābiribu. Marí Opū Jesucristo pagumu Santiago direta iābu. ²⁰Marípu iūrō musārē gojāa. Yu gojari, ārigatori meta āārā.

²¹Jerusalégue āārídi Siria nikūgue, Cilicia nikūgue waabu. ²²Iripoeere Judea nikūgue āārírā Jesucristore būremurī buri marā yure iāmasibirima. ²³Yaa kere direta pénerā āārímá. Igūsārē yaamarē wererā āsū āri werenerā āārímá: “Sōō āārídeapoeugere maríre ñerō iriduari merā būro iaturituyadi, marí Jesucristore būremurírē peoduadi daporague masakare: ‘Jesucristore būremuka!’ āri weregorenagū iriyapū”, āri werenerā āārímá. ²⁴Irasirirā Judea nikūgue āārírā Jesucristore būremurā yu igūrē būremurírē pēra, Marípure usuyari sīnerā āārímá.

**Jesús buedoregu pínērā Pablora
ōārō bokatíríneādea**

2 ¹Catorce bojori puru, dupaturi Jerusalégue Bernabé merā waabu doja. Tito wāikugūdere āīabu. ²Marípu yure irogue waadoremi. Irasirigu irogue waabu. Iroguere eja, Jesúre būremurā opará merā dita nerē, wereníbu. Judío masaka āārimerārē Marípu Cristo merā marírē tauri kerere yu buedeare igūsārē werebu. Yu neōgorague buenugādeare, dapura yu buerire: “Diaye āārā,

ōāgorāa”, āri masíbuo, ārīgū, irasū āri werebu. Gajerā yu buerire: “Wajamāa”, ārírí, ārīgū, irasū āri werebu. ³Titodere, igū judío masaka āāríbirikererupu: “Gua judío masaka iririkurosū dupuma gasirogārē” wiiriro gāamea”, neō ārībiri. ⁴Irire dorebirikererupu, gajerā ubu ārīboerā gapu: “Moisés doredoredosūta dupuma gasirogārē wiiriro gāamea”, ārīma. Igūsā Jesúre būremugatorā, irigatorimasā āārímá. Irasirirā, gua judío masaka āārikererā Jesúre būremurā iririre iāmurā gua nerērōgue gua merā nerēnama. “Guare peamegue waabonerārē tausūmurā, Jesucristore būremurō gāamea. Moisés doredere iriri merā tausūbirikoa”, ārímakū iāma. Irire iārā: “Moisés doredere irirā dita tausūrākuma, irasirirā igū doredere irika!” ārīma. Guare irire būremudorerā, irasū ārīma. ⁵Igūsā guare irasū dorekererupu, neō igūsā dorerire iribiribu. Gua musārē Jesucristore būremurī merā dita tausūrākua, ārírí kerere: “Diaye āārā”, āri būremunímakū gāamea. Irasirirā igūsā dorerire neō iribiribu.

⁶Jesúre būremurā opará yure: “Āsū gapu wereka!” ārībiri. “Judío masaka āārimerārē: ‘Gua ñekūsāmarārē Moisés iridoredere iriro gāamea’, āri wereka!” ārībiri. Igūsārē masaka būremukererupu, Marípu āārípererārē sūsosū iāmi. Irasirigu: “Īsā opará, yu nemorō āāríma”, āri gūñabiribu. “Marípu igūsārē beyederosūta yudere beyemi”, āri gūñabu. ⁷Oparā irasū yure: “Āsū gapu wereka!” ārīrōno irirā, yure iāmasi, āsū ārīma: “Mūde, Marípu judío masaka āārimerārē Jesucristoya kerere weredoregu beyepídita āārā. Marípu Pedroe judío masakare iri kerere weredoredosūta mūdere iri kerere weredoreñumi”, ārīma yure. ⁸Marípu Pedroe judío masakare Jesucristoya kerere weredoregu iriudi āārímí. Igūta

“2.3 Gn 17.1-14: Iripoege Marípu Abrahārē igū pūrā ūmarē: “Yaara āārīburo”, ārīgū, igūsāya dupuma gasirogārē wiiridoredi āārímí. Puru iri dorerire Moisére pídi āārímí. Irasirirā judío masaka Abraham parāmerā āāríturiarā iri dorerire irirā, igūsā pūrā ūmarē su mojóma pere gají mojó ureru pērebejarinurí waarō merā igūsā deyoadero puru irasū yāma.

yudere judío masaka ããrimerã puro iri kerereta weredoregu iriumi.

⁹Jerusalégue Jesúre buremurã urerã oparã: Santiago, Pedro, Juan wãikurã ããrímã. Gajerã oparã memoro ããrímã. Ìgüsã yure Marĩpu Ìgũ maĩri merã beyepidi yu ããrímakũ Ìãmasĩ, yure, Bernabédere òãrò bokatĩri: “Marĩ surosũ moãrãkoa”, ãrĩma. “Musã Jesucristoya kerere judío masaka ããrimerãrẽ wererã waaka!” ãrĩma. “Gua gapu judío masakare wererãkoa”, ãrĩma. ¹⁰Guaere: “Bopoñarãrẽ iritamuka!” ãrĩri direta werema. I dita ããrĩbũ: “Yu òãrò irigura”, ãrĩ, bũro gũñadea.

Pablo Pedre Antioquíague werede

¹¹Puru gua Antioquía wãikuri makãgue ããrĩripoe Pedro ejami. Ìgũ irogu ejadero puru keoro iribirimakũ Ìã, Ìgũguereta turaro merã werebũ. ¹²Iro dupuyuro Ìgũ irogu ããrĩgũ, judío masaka ããrimerã Jesúre buremurã merã baa, ããrĩrikukòãyupũ. Ìgũ irasiriripoe gajerã judío masaka Santiago iriunerã ejañurã. Ìgüsã ejamakũ Ìã, judío masaka ããrimerã merã ããrãdi ããrĩduúkòãyupũ: “Yure turibokuma”, ãrĩgũ. Irogu ejanerã judío masaka ããrimerãrẽ: “Moisés dorederosũta dupũma gasirogãrẽ wiiri gããmea”, ãrĩ weregonenarã irĩñurã. Irasirĩgu Pedro, Antioquía marã Ìgüsãya dupũma gasirogãrẽ wiirisũbirinerã ããrímakũ, Ìgüsã merã baa, ããrĩrikuadi duúkòãyupũ. ¹³Ìgũ irasirimakũ Ìãrã, gajerã judío masaka Jesúre buremurã, Ìgũ irirosũta irigatori merã irĩñurã. Judío masaka ããrimerã merã ããrĩrikuanerã, Ìgüsã merã baanerã baanemobiriñurã. “Ìgüsã merã baaduũmakũ òãbea”, ãrĩ masikeregu, Bernabéde Ìgüsã irirosũta iriyupũ. ¹⁴Ìgüsã: “Jesucristore buremurã merã dita tausũrãkoa”, ãrĩri kerere masikererã, keoro iribirima. Irasirĩgu, irire Ìã, Pedre ããrĩpererã Jesucristore buremurã Ìũrògue bũro turaro merã ãsũ ãrĩ werebũ: “Mu judío masakũ ããrĩkeregu, judío masaka ããrimerã irirosũta Ìgüsã merã baa, ããrĩkòãbũ. Mu

irasirigu, Moisés marĩrẽ judío masakare iridorederosũ iribiribũ. ¿Nasirĩgu judío masaka ããrimerã gapũre: ‘Gua judío masakã iririkũrere irika!’ ãrĩduari?” ãrĩbũ Ìgũrẽ.

Ããrĩpererã Jesúre buremurã tausũrãkuma, ãrĩ gojadea

¹⁵Gua neò deyoarãgueta judío masaka ããrĩsianerã ããrĩbũ. Gaji buri marã irirosũ Marĩpu Moisére doreri pídeare tarĩngãbea. ¹⁶Irasũ ããrĩkererã, Ìre masã. Marĩpu Moisére Ìgũ doreri pídeare masaka irimakũ meta Ìgüsãrẽ: “Òãrã, waja opamerã ããrímã”, ãrĩ Ìãmi. Masaka Jesucristore buremumakũ, Marĩpu Ìgüsãrẽ: “Òãrã, waja opamerã ããrímã”, ãrĩ Ìãmi. Irasirirã guade Jesucristore buremunugãbũ. Ìgũrẽ buremumakũ, Marĩpu guadere: “Òãrã, waja opamerã ããrímã”, ãrĩ Ìãmi. Marĩpu, iri doreri pídeare gua irimakũ meta guare irasũ ãrĩ Ìãmi. Neò sugũ masakũ iri doreri pídeare iripeomasĩbemi. Irasirĩgu Marĩpu neò sugũre: “Yu dorerire iripeokòãmi, irasirĩgu Ìgũrẽ: ‘Òãgũ ããrĩmi’, ãrĩ Ìãã, ãrĩbirikumi.

¹⁷Irasirirã: “Gua Jesucristore buremumakũ, Marĩpu guare: ‘Òãrã, waja opamerã ããrímã’, ãrĩ Ìãmi”, ãrĩrã: “Gua judío masakade Marĩpu Moisére doreri pídeare iripeobirikoa, irasirirã guade ñerò yãa”, ãrĩ masã. ¿Irire irasũ ãrĩ masĩrã: “Jesucristore buremusĩã, ñerò irikerepurũ, òãgorãa”, ãrĩrã yãri? Irire neò ãrĩbea. Jesucristo guare Ìgũrẽ buremurãrẽ ñerò siiu irigu meta ããrĩmi. ¹⁸Irasirĩgu masakare ãsũ ãrĩ werea. “Jesucristore buremumakũ, Marĩpu musãrẽ: ‘Òãrã, waja opamerã ããrímã’, ãrĩ Ìãmi” ãrĩ werea. “Marĩpu Moisére Ìgũ doreri pídeare musã irimakũ, musãrẽ: ‘Òãrã, waja opamerã ããrímã’, ãrĩ Ìãmi”, ãrĩgũ meta yãa. Ìgüsãrẽ: “Marĩpu Moisére doreri pídeare musã iriri merã Marĩpu Ìũrò waja opabirikoa”, ãrĩgũ, yude waja opabokoa irire iripeobirisĩã. ¹⁹Iripoeguere: “Yu, Marĩpu Moisére doreri pídeare irigu, Ìgũ Ìũrò waja opabi ããrĩgukoa”, ãrĩ gũñadibũ. Irasũ

ārī gūñakeregu, bokatiūbirikubu. Waja opagu, peamegue waabodi āārībú. Daporare: “Iri dorerire iriri merā Marīpu merā ōārō āārā”, neō ārī gūñanemobea. “Jesucristore būremusiā, Marīpu merā ōārō āārī, īgū gāamerīrē yāa”, ārī masīa. ²⁰ Jesucristo Marīpu magū yure maīgū curusague boagu, yu ñerō iridea wajare wajaribosadi āārīmí. Yu īgūyagu āārīsīā, īgū boaderosūta yude īgū merā boadi irirosū waadi āārībú. Sugu boagu īgū iriduare neō irinemomasībi irirosū waadi āārībú. Irasirigu Cristore būremusiā, yu iriduare piri, īgū turaro merā īgūyare irigu yāa. ²¹ Yu: “Marīpu Cristo merā marīrē ōārō iritamudi āārīmí”, ārī būremurīrē piriduabea. Marīpu Moisére īgū doreri pīdeare marī iriri merā waja opabirimakū, Cristo marī ñerō iridea waja boabosadea wajamarībokuyo.

¿Moisés doredeare iriri merā, o Jesucristore būremurī merā Marīpuyarā āārīrī? ārī gojadea

3 ¹ Musā Galacia marā pēmasīmerā irirosū irirā yāa. ¿Nasirirā ārīgatorimasā buerire pēnugārī? Īgūsā buerire pēsīā, Jesucristoya diayema kerere būremurīrē pirirā yāa. Gua, musā pāroge āārīrā, musārē Jesucristo curusague boadea kerere diaye werebu. Iri gua wererire musā ōārō pēbu. ² Irasirigu musārē ire sērēñaduakoa. ¿Musā Moisés doredeare iriri merā Ōāgū deyomarīgūrē opanugārī? Īgūrē opabiribu. Jesucristoya kerere pērā, īgūrē būremunugārā, Ōāgū deyomarīgūrē opanugābu. ³ ¿Nasirirā daporare pēmasīmerā irirosū irirā yārī? Musā Jesucristore būremurā Ōāgū deyomarīgū iritamurī merā Marīpu dorerire irinugābu. ¿Nasirirā daporare īgū iritamurī marīrō musā basī musā turari merā iri dorerire iripeoɖuari? ⁴ ¿Musā Jesucristore būremunugārīpoe gajerā musārē ñerō tarimakū irideare gūñaberi? Daporare īgūya kerere būremuduārā: “Ubugora irire būremubu”, ¿ārī gūñarī? ⁵ Marīpu

musārē īgūyagure Ōāgū deyomarīgūrē iriudi āārīmí. Ōāgū deyomarīgū musā merā āārīmakū, Marīpu īgū turari merā musā watopeguere wāri iri īmurīrē irigu yāmi. Musā Moisés doredeare irimakū, ¿irasirigu yārī? Iribemi. Musā Jesucristoya kerere pé būremumakū gapu irasū yāmi.

⁶ Abraham Marīpūre būremumakū, Marīpu īgūrē: “Ōāgū, waja opabi āārīmí”, ārī īadi āārīmí. ⁷ Irasirirā musā ire masīka! Abraham Marīpūre būremuderosūta būremurāno Abraham parāmerāgora āārīma. ⁸ Marīpūya werenírī gojadea pūgue judío masaka āārīmerādere īgūsā Marīpūre būremumakū, Marīpu īgūsārē: “Ōārā, waja opamerā āārīma”, ārī īāburire gojasiasūdero āārībú. Marīpu Abrahamē irire weregu, āsū ārīdi āārīmí: “Yu, mu merā āārīpereri buri marārē ōārō irigura”, ārīdi āārīmí. ⁹ Abraham Marīpūre būremumakū, Marīpu īgūrē ōārō iridi āārīmí. Irasirigu daporadere āārīpererā īgūrē būremurānorē ōārō yāmi.

¹⁰ “Moisés doredeare irimakū, Marīpu marīrē: ‘Ōārā, waja opamerā āārīma’, ārī īāgukumi”, ārī gūñarānorē Marīpu wajamoāgukumi. Marīpūya werenírī gojadea pūgue irimarē āsū ārī gojasūdero āārībú: “Āārīpereri Moisés doredeare iripeomerāno wajamoāsūrākuma”, ārī gojasūdero āārībú. ¹¹ Neō sugu Moisés doredeare iripeomasīgū māmí. Irasirigu Marīpu neō sugure: “Yu dorerire iripeokōāmi, irasirigu īgūrē: ‘Ōāgū āārīmí’, ārī īāa”, ārībirikumi. Irere marī masīa. Marīpūya werenírī gojadea pūgue āsū ārī gojasūdero āārībú: “Marīpu īgūrē būremurārē: ‘Ōārā, waja opamerā āārīma’, ārī īāmi. Irasirirā īgū merā ōārō āārīnīkōārākuma”, ārī gojasūdero āārībú. ¹² Moisés doreri gojadea pūgue: “Marīpūre būremugūno Marīpu iūrō waja opabi āārīmí”, neō ārī gojasūbiribu. Āsū gapu ārī gojasūdero āārībú: “Āārīpereri Moisés doredeare iripeogūno, Marīpu merā ōārō āārīnīkōāgukumi”, ārī

gojasüdero ääríbú. Iri dorerire iripeobi gapure Marípu ígürê: “Yu iürö waja opami, yu merä neö öärö ääríbirikumi”, äri iägukumi.

¹³ Irasirigu, marí äärípererä Moisés doredeare iripeobirimakü, Marípu marírê: “Iri dorerire iripeobema”, ärigü: “Waja opama”, äridi äärímí. Irasirigu Jesucristo curusague pábiatúsügü, waja opagü irirosü marírê wajamoãbodeare boa, wajaridi äärímí. Marípuya wereníri gojadesa pügue äsü äri gojasüdero ääríbú: “Sugü yukugue siasiusiadi, Marípu wajamoãdoreadi äärímí”, äri gojasüdero ääríbú. Jesucristo boari merä marí ñerö iridea wajare taudi äärímí. ¹⁴ Ígü marí ñerö iridea wajare boa, wajaribosadea merä Marípu Abrahâre: “Irasüta irigüra”, äriderosüta judío masaka äärímerädere iridi äärímí. Irasirigu ígü äriderosüta marírê Jesucristore büremurâre: “Öärä, waja opamerä ääríma”, äri iä, Öägü deyomarígürê sídi äärímí marí merä ääríburo, ärigü.

Marípu: “Abraham merä äsü irigüra”, äridea

¹⁵ Yaará, masaka ígüsä iririkürire, su keori merä müsârê weregura. Ígüsä: “Äsü irirá!” äri, oparä puo papera ämukuma. Ígüsä irire ämuadero puu, neö gajerä ígüsârê: “I pürê beókóäka! Äsü gapü gojaka!” äribirikuma.

¹⁶ Marípu Abrahâre ígü äridea, i irirosüta äärä. Gajerä ígü ärideare neö béomasíbema. Äsü äri weredi äärímí ígürê: “Mü parämi ääríturiagu merä äärípereri buri marârê öärö irigüra”, äridi äärímí. “Mü parämerä ääríturiarä merä öärö irigüra”, äribiridi äärímí. Ubu gapü: “Mü parämi ääríturiagu sugü meräta irasirigüra”, äridi äärímí. Irasü ärigü, Jesucristore ärigü iridi äärímí. ¹⁷ Yu müsârê wereri äsü äriduaro yä. Marípu Abrahâre masakare ígü öärö iriburire weredi äärímí. Püru cuatrocientos treinta bojori puu, Marípu ígü doreri Moisére pídi äärímí. Irire pígu, Abrahâre: “Yu irasirigükoa”, ärideare peremakü iribiridi äärímí.

¹⁸ Marípu, Moisés doredeare irirá direta: “Yu merä öärö äärírukuma”, ärimakü, ígü Abrahâre äridea wajamaríbokuyo. Irasü ääríbea. Marípu Abrahâre maígü wajamaríro ígü: “Äsü irigüra”, ärideare keoro iridi äärímí. (“Äärípererä mü irirosü yure büremurâre yu merä öärö äärímakü irigüra”, äridi äärímí.)

¹⁹ Iro merê, çnasirigu Marípu ígü dorerire Moisére píyuri? Masaka ñerö irirá, waja oparä äärírirê ígüsârê masidoregü irire pídi äärímí. Abraham parämi ääríturiagu Jesucristo aaripoeque Marípu masakare: “Äsü irika!” äri pítinudi äärímí. Jesucristo aarimakü, Marípu Abrahâre: “Mü parämi ääríturiagu merä äärípereri buri marârê öärö irigüra”, äridea keoro waabu. Marípu ígü dorerire ígürê wereboerâre Moisére weredoredi äärímí. Irasirigu Moisés irire pígu, masakare wereturíadi äärímí. ²⁰ Marípu Abraham parämi ääríturiagu merä masakare öärö iriburire gajerägue merä Abrahâre weredorebiridi äärímí. Ígü basita weredi äärímí. (“Irasiriro Abrahâre ígü weredea gapü, Moisére ígü dorerire pídea nemorö äärä.”)

Pablo, Moisés doredeare weredea

²¹ Iro merê, Marípu Abrahâre weredea, ígü dorerire Moisére pídea nemorö äärímakü, çígü dorerire Moisére pídea gapü wajamaríyuri? Irasü ääríbiridero ääríbú. Äsü gapü äärä. Masaka äärípereri Moisés doredeare iripeori merä Marípu merä öärö äärímasímakü, Marípu irire iripeorâre: “Öärä, waja opamerä ääríma”, äri iábodi äärímí. ²² Marípuya wereníri gojadesa pügue irimarê äsü äri gojasüdero ääríbú: “Masaka äärípererä ñerö irirá, waja oparä ääríma”, äri gojasüdero ääríbú. Irasirigu Marípu Abrahâre: “Mü parämi ääríturiagu merä äärípereri buri marârê öärö irigüra”, äriderosüta irigükumi. Äärípererä Jesucristore büremurâre: “Öärä, waja opamerä ääríma”, äri iägukumi.

²³ Marí Jesucristoya kerere pé, ígürê büremuburi dupuyuro Marípu ígü

dorerire Moisére pídea direta masínerā āārībú. Irasirirā marī ñerō iridea waja peresugue dobosúnerā marírē peresu iridi doreri direta masírā irirosú āārínerā āārībú. ²⁴Marípū ígū dorerire Moisére pídea merā marī iri dorerire iripeomerā āārírírē masímakū iridi āārímí. Pūru Cristoyare masímakū iridi āārímí ígūrē būremumakū, marírē: “Ōārā, waja opamerā āāríma”, āri íābu.

²⁵Daporare Jesucristore būremua. Irasirirā ígūrē būremusiā: “Marípū Moisére ígū doreri pídeare marī irimakū meta marírē: ‘Ōārā, waja opamerā āāríma’, āri íāmi”, āri masía.

²⁶Irasirirā musā āārípererā Jesucristore būremurí merā ígūyarā āārísíā, Marípū pūrā āārā. ²⁷Musā āārípererā deko merā wāyesúnerā āārībú musā Cristoyarā āārírírē ímumurā. Irasirirā ígūyarā āārísíā, ígū irirosú āārírikua. ²⁸Marí āārípererā ígūyarā āārísíā, sugūyarāta āārā. Irasirigū Marípū judío masakare, judío masaka āārímerādere, moāboerimasārē, moāboemerādere, úmarē, nomedere sūrosúta íāmi. Irasiriro marírē Jesucristoyarārē dukawari masíña máa. ²⁹Marí Cristoyarā āārísíā, Abraham parāmerā āāríturiarā āārā. Irasirigū Marípū Abrahāre: “Murē ōārō irigūra”, āriderosúta marídere irigukumi. Marí Cristoyarā āārímakū, marírē irasirigukumi.

4 ¹Musārē i keori merā wereduakoa. Sugu majígū āārípereri ígū paguyare opaturíabu āāríkeregu, majígū āārísíā, sugu moāboegu irirosú āāríkumi. ²Gajerā ígūrē, ígūya āāríburidere íādurípíbosakuma. Irasirigū, ígūsā doreri doka āāríkumi. Sunū ígū pagū, ígū boaburi dupuyuro ígūya āārādeare ígū magūrē wiaburínurē werepíkumi. “Inu ejamakū, āārípereri yaa āārídeare yu magūrē wiaka!” āríkumi. Irasirirā irinū ejamakū, ígūrē wiakuma pama. ³Maríde Jesucristore būremuburi dupuyuro marí ñekūsāmarā i úmumarē buerire irituyarā, majígū ígū āāríderosú marí ñekūsāmarē doreri doka

āāríunanerā āārībú. Irasirirā gajerārē moāboerā irirosú āārínerā āārībú.

⁴Irasū āāríkerepuru, Marípū gapu ígū: “Āsū irigura”, ārīdeanu ejamakū, keoro ígū magūrē i úmūguere iriudi āārímí. Ígū iriumakū, sugo nomeōguere deyoadi āārímí. Ígū judío masakū āārísíā, Marípū doreri Moisére pídeare iridi āārímí. ⁵Marípū ígū magūrē, marí iri dorerire iripeobiri wajare boa, wajaribosadoregu iriudi āārímí ígū pūrā waaburo, ārígū.

⁶Irasirigū Marípū marírē: “Yu pūrā āārísíama”, ārígū, ígū magū Jesucristo merā Ōágū deyomarígūrē iriudi āārímí. Irasirirā Ōágū deyomarígū iritamurí merā Marípūre: “Guapu”, āri masía. ⁷Marí, Marípū pūrā āārísíā, moāboerimasā irirosú āāríbea pama. Irasirirā āārípereri Marípū ígū magū Cristo iridea merā marírē ígū pūrārē síburire ñeārākoa.

Pablo Jesúre būremurārē Galaciague āārírārē gūñarikudea

⁸Iripoeguere musā Marípūre masíbirisíā, gajerānorē būremunerā āārībú. Ígūsārē būremurā, ígūsā doreri doka āārítuuyanfrā irirosú āārínerā āārībú. Marípūgorare būremubirinerā āārībú. ⁹Dapora musā Marípūre masía. Ígū musārē masígū ígūrē masímakū iridi āārímí. Musā ígūrē masísíā, musā iripoegue ubu āārírírē būremudeare būremuduúkōānerā āārībú. Irasirikererā, daporare Moisés doredeare iripeoduarā, musā ubu āārírírē būremupūrorideare būremurā irirosú irirā yaa. ¿Nasirirā irire irasirirā yári? ¿Nasirirā dupaturi moāboerimasā irirosú āāríduari doja? ¹⁰Musāde, Marípū merā ōārō āāríduarā, judío masaka bosenurí irinarosúta iriadíkua. Iri bosenurírē irirā, siunājārínuriku, abe deyoariku, gajinurí bosenuriku, bojoriku bosenurírē irikua. ¹¹Musā irasirimakū pégu: “¿Yu ígūsārē ubugora bueyuri?” ārígū, būro musārē gūñarikua.

¹²Yarā, yu musārē āsū irimakū gāamea. Musā judío masaka āāríbirisíā,

Moisés doredeare iribirinerā āārībú. Yũde, judío masaku āārikeregũ, musā iriderosũta iri dorerire iribea. Irasirĩgu dupaturi musādere yũ irirosũ irimakũ gāāmea. Marĩ Jesucristore bũremusĩā, Marĩpũ merā ōārō āārĩmasĩa. Yũ musārē Jesucristoyare buemakũ, musā yũre neō ñerō iribiribu. ¹³Musā masĩa. Yũ, Jesucristo masakare tauri kerere musārē buerũrorĩgu, pũrĩrikubũ. ¹⁴Yũ pũrĩrikumakũ musārē diasagorabũ. Irasũ āārĩkererũ, musā yũre iaturĩ doobiribu. Ubu gapũ Marĩpũ wereboegure irirosũ ōārō bokatĩrĩneābũ. Jesucristore irirosũ yũre ōārō iribu. ¹⁵Musā yũ merā usũyari opadea, ĩnaasũ waāari? Ire yũ masĩa. Musā irasirimasĩrā, musāya koyere yũre wea sĩbokuyo yũre iritamumurā. ¹⁶Yũ musārē diayemarē weredeade waja daporare yũre: “Gũare iaturĩgu irirosũ irĩgu yāmi”, ĩārĩ iārĩ?

¹⁷Gajerā ārĩgatori merā buerimasā gapũ musārē bũro iritamudũarā irirosũ irikererā, ōārō merā irirā meta āārĩma. Musārē gua buerire iritũyarire piri, ĩgũsā bueri gapũre iritũyadorerā yāma. ¹⁸Gajerā musārē iritamudũamakũ ōāgorāa. ĩgũsā musārē iritamudũarā, ōārō gũñarĩ merā iritamunĩkōāburo. Yũ musā merā āārĩmakũ direta irasirĩbirikōāburo. ¹⁹Musā yũ pũrā irirosũ āārĩrārē musāya āārĩburire gũñagũ, dupaturi bũro pũrĩsũrĩ merā ñerō tarĩgu irirosũ āārā. Sugo nomeō pũrākũburi dupuyuro pũrĩrĩ peñarōsũ peñakoa. Musā Jesucristo irirosũ āārĩrikumakũge, irasũ poyarikũtũnugukoa. ²⁰Yũ musā pũro musā merā bũro āārĩduadikoa. Musārē daporata turiro marĩrō ōārō pemasĩma ōārō wereduadikoa. Wereduakeregũ, ñeeno merā werenĩumasĩbirikoa.

**Pablo, Agar, Saraya keori
merā weredeade**

²¹Musā, Moisés doredeare iridũakererā, ĩnasirirā iri dorerire ōārō pemasĩberĩ? ²²Marĩpũya werenĩrĩ gojadea pũgue āsũ ārĩ gojasũdero

āārĩbú: “Abraham pērā ũma pũrākudi āārĩmĩ. Sugũre ĩgũ marāpore moāboego Agar wāĩkũgo merā pũrākudi āārĩmĩ. Gajĩge ĩgũ marāpo diaye Sara merā pũrākudi āārĩmĩ. Igo, moāboego meta āārĩdeo āārĩmó”, ārĩ gojasũdero āārĩbũ. ²³Abraham marāpore moāboego magũ marĩ masaka deyoarosũta deyoadi āārĩmĩ. Abraham marāpo magũ gapũ Marĩpũ Abrahārē: “Mũ marāpo sugũ majĩgũ pũrākũgokumo”, ārĩderosũta deyoadi āārĩmĩ.

²⁴⁻²⁵ĩgũsā pērā nomeya, pe keori irirosũ āārā. Saraya: Abraham, Marĩpũ ĩgũrē ārĩdeare bũremuderosũta Jesucristore bũremurāya keori irirosũ āārā. Agarya: Marĩpũ Sinai wāĩkũri buĩrugue Arabia nĩkũge ĩgũ dorerire Moisés pídeare irirāya keori irirosũ āārā. Agar, moāboego āārĩsĩā, ĩgo magũde moāboegu āārĩdi āārĩmĩ. Irasirirā Moisés doredeare irirā ĩgo magũ irirosũ āārĩma. Moāboerā irirosũ iri doreri doka āārĩma. Daporare Jerusalén marā Moisés doredeare irirā, Agar magũ irirosũ āārĩma. Irasirirā, moāboerā irirosũ iri doreri doka āārĩma. ²⁶Saraya: Jerusalén ũmũgasima makā marā Jesucristore bũremurāya keori irirosũ āārā. Sara, moāboego āārĩbirimakũ, ĩgo magũde, moāboegu meta āārĩdi āārĩmĩ. Irasirirā marĩ Jesucristore bũremurā, Sara magũ irirosũ āārā. Moāboerā irirosũ Moisés doreri doka āārĩrā meta āārā. ²⁷Marĩpũ ĩgũya werenĩrĩ gojadea pũgue āsũ ārĩdi āārĩmĩ:

“Nomeō, mũ pũrā marĩkerego, usũyaka! Sugo nomeō, pũrākũgo pũrĩrĩ peñarōsũ peñabirĩkerego, bũro usũyaka! Mũ pũrā marĩkererũ, pũrũguere mũ parāmerā āārĩturĩarā wārā āārĩrākuma.

Gajego marāpũkũgo ĩgo marāpũ merā āārĩgō parāmerā āārĩturĩarā nemorō wārā āārĩrākuma”, ārĩdi āārĩmĩ Marĩpũ. ((Iri ārĩdea āsũ ārĩduaro yāa. Jesucristore bũremurā Sara parāmerā āārĩturĩarā āārĩma. ĩgũsā, Moisés

doredeare irirā nemorō wárā
 āārīrākuma.))^b

²⁸Irasirirā yaarā, marī Sara magū
 Isaac irirosū āārā. Marīpu pūrā
 Abrahārē ārīderosūta Sara Isaace
 pūrākudeo āārīmó. Irasirigu Marīpu
 ĩgū ārīderosūta marīrē Jesucristore
 buremurārē ĩgū pūrā āārīmakū iridi
 āārīmí. ²⁹Iripoeguere Agar magū marī
 masaka deyoaderosūta deyoadi, Sara
 magū Ōāgū deyomarīgū turari merā
 deyoadire ĩaturi, ñerō iridi āārīmí.
 Daporadere irasūta āārā. Moisés
 doredeare irirā, marīrē Jesucristore
 buremurārē ĩaturi, ñerō irirā yáma.
³⁰Marīpu ĩgūya werenírí gojadea pūgue
 Abrahārē āsū ārīdi āārīmí: “Moāboego
 magū mu siburire opabirikumi. Mu
 marāpo diaye moāboego āārībeo magū
 gapu mu siburire opagukumi. Irasirigu
 moāboegore, igo magū merāta béoka!”
 ārīdi āārīmí Marīpu. ³¹Irasirirā yaarā,
 marī Jesucristore buremurā, Sara
 parāmerā āārīturiarā āārā. Moāboego
 parāmerā āārīturiarā meta āārā. Sara
 magū ĩgū pagu siburire opaderosūta,
 marī Marīpu ĩgū pūrārē siburire
 oparākoa.

**Pablo: “Jesucristoyare buremurirē
 pibirikōāka!” ārī gojadea**

5 ¹Jesucristo marīrē Moisés doreri
 doka āārīnerārē taudi āārīmí.
 Marī ñerō iridea wajare ĩgū boari merā
 wajaribosadi āārīmí, Marīpu merā ōārō
 āārīburo, ārīgū. Irasirirā musā Marīpu
 pūrā āārīsīā, Jesucristoyare gūñaturari
 merā buremuníkōāka! Ārīgatori merā
 buerimasā musārē Moisés doredeare
 iridoremakū, ĩgūsārē pébirikōāka!
 Iri dorerire irirā, moāboerā irirosū
 āārīma. Irasirirā iri doreri doka neō
 āārīnemobirikōāka!

²Ōārō péka yure! Yu Pablo, musārē
 ire weregura. “Guaya dupuma
 gasirogārē wiirirā, Marīpu merā ōārō
 āārīrākoa”, ārī gūñabirikōāka! Musā
 irasū ārī gūñamakū, musārē Jesucristo

boabosadea wajamarīboyo. ³Irasirigu
 gopeyari merā musārē werea doja.
 Marīpu merā ōārō āārīburiere ĩgūsāya
 dupuma gasirogārē wiirirānorē Moisés
 doredeare āārīpererire iripeoro
 gāāmea. ⁴Musā: “Moisés doredeare
 irimakū, Marīpu guare: ‘Ōārā, waja
 opamerā āārīma’, ārī ĩāgukumi”, ārī
 gūñarā, Jesucristore pirirā yāa. Musā
 irasirirā, Marīpu musārē maīgū ōārō
 iritamurīdere gāāmebea. ⁵Marī:
 “Ōāgū deyomarīgū iritamurī merā
 Jesucristore buremunimakū, Marīpu
 guare: ‘Ōārā, waja opamerā āārīma’,
 ārī ĩāmi”, ārī masā. ⁶Irasiriro, marī
 Jesucristoyarā āārīmakū, Marīpu ĩūrō
 dupuma gasirogārē wiirisūnerā āārīrī,
 wiirisūbirinerā āārīrīde wajamāa.
 Marīpu ĩūrō marī Jesucristore buremurā
 āārīrī gapu wajakua. ĩgūrē buremusīā,
 gajerārē maīa.

⁷Musā Jesucristore buremunūgārā,
 ĩgūyare ōārō irituyanerā āārībū. Dapora
 gapure gajerā musārē ĩgūya diayemarē
 ōārō irituyabirimakū irirā yāma. ⁸ĩgūsā
 musārē irasirirā Marīpu gāāmerī gapure
 irirā meta yāma. Marīputa musārē
 Jesucristore buremunūgādoregu siudi
 āārīmí, Jesucristoyare ōārō irituyaburo,
 ārīgū. ⁹Masaka āsū ārī werema: “Pārē
 irirā, mērōgā pá wemasārī poga merā
 trigo pogare morékuma. Pura iri
 wemasāseyakōāka”, ārī werema. I
 irirosū, ārīgatori merā buerimasā
 buerire surāyeri irire irituyarā, purugue
 musā āārīpererā ārīgatori buerire
 irituyarākoa. ¹⁰Yu gūñaturari merā
 marī Opu Jesucristore buremua.
 Musāde, yu irirosū ĩgūrē buremua.
 Irasirigu musāya āārīburiere āsū ārī
 gūñāa: “ĩgūsā ārīgatori merā buerimasā
 buerire irituyarire piri, dupaturi
 yu irirosū Jesucristoya diayemarē
 irituyarākuma doja”, ārī gūñāa. Marīpu,
 musārē ārīgatori merā buerā gapure
 wajamoāngukumi.

¹¹Yaarā, gajerā yure āsū ārīma:
 “Pablo masakare: ‘Marīpu merā ōārō

^b 4.27 Is 54.1

ääríduarā, dupuma gasirogārē wiirika! ārī buemi”, ārīma. Yū irire neō irasū ārī buebea. Yū irasū ārī buemakū, judío masaka gajerārē irire iridorerā yure ñerō iribiribokuma. Yū, Jesucristo ĩgū curusague boari merā masakare tauri kere gapure buea. Yū irire bueri waja judío masaka yure ñerō tarimakū yāma. ¹²Yū, ĩgūsā ārīgatori merā buerimasā musārē dupuma gasirogārē wiiridorerārē musā puro neō āārīnemobirimakū gāāmea. Musārē irasū wiiridoreduarā, ĩgūsā basi wiiri, pūrā marīrā dujaburo.

¹³Yaarā, Marīpu musārē Moisés doreri doka āārīburo, ārīgū meta siiudi āārīmī. Irasirirā: “Gua gāāmerō ñerī uaribejarire irimakū oārokoa”, ārī gūñabirikōāka! Āsū gapu irika! Maīrī merā gāme iritamunika! ¹⁴Musā gajerārē diaye maīrā, Moisés doredeare āārīpererire irirā yāa. Irasūta ārī gojasūdero āārībū: “Mū basi maīrōsūta mū puro āārīrādere maīka!” ārī gojasūdero āārībū. ¹⁵Irasirirā pēmasīka! Musā gāme ĩaturiduumerā, pūrīsūrī sītīrī wereníduumerā, musā basi gāme dukawaripereakōārākoa.

Pablo: “Ōāgū deyomarīgū gāāmerirē irinika!” ārī weredea

¹⁶Yū musārē āsū ārī werea. Ōāgū deyomarīgū gāāmerirē irinika! Musā irasirirā, musā gāāmerō ñerī uaribejarire iribirikoa. ¹⁷Marī ñerī uaribejari, Ōāgū deyomarīgū gāāmerī meta āārā. Irasirirā marī ñerī uaribejarire irirā, Ōāgū deyomarīgū gāāmerirē irirā meta yāa. Ōāgū deyomarīgū gāāmerī gapure irirā, marī gāāmerō ñerī uaribejarire iribirikoa. ¹⁸Marī Ōāgū deyomarīgū marīrē iridorerire irirā, Moisés doreri doka āārīrā meta āārā. “Marī Moisés doredeare irirā, Marīpu merā oārō āārīrākoa”, ārī gūñabea.

¹⁹Masaka ĩgūsā ñerī uaribejarire irimakū, marī oārō ĩamasía. ĩgūsā ñerī uaribejarire irirā, āsū yāma: Ūma, ĩgūsā marāposā nome āārīmerārē; nomede,

ĩgūsā marāpusāmarā āārīmerārē ñerō gāmebiragorenama. Āārīpereri guyasūrī, ñerō iririre yāma. Guyasūrīrō marīrō ñerō iririre taubéokōāma. ²⁰Keori weadeare buremuma. Yēa iririre yāma. Gajerārē ĩaturī dooma. Gāme guaseoma. Gāme ĩaturima. Gajerā merā mata gua, sītīrī wereníma. ĩgūsāya āārīburi direta gūñama. ĩgūsā gāāmerī direta iriduarā, ĩgūsāya bumarārē gāme dukawarimakū yāma. ²¹Gajerārē gajinorē ĩgūsā opamakū, ĩaturima. Masakare wējēbéoma. Mejārikurā āārīma. Bosenūrīrē irirā, mejārā ñerirē yāma. Irasū āārīmakū, wāri gajino ñerīdere yāma. Irasirīgu yū musārē āārīderosūta gopeyari merā werea doja. Iri ñerirē irinīgūno, Marīpu ĩgūyarārē dorerogueru waabirikumi.

²²Ōāgū deyomarīgū gapu marīrē ĩgūyare irimakū yāmi. Irasirirā ĩgū iritamurī merā masakare maīa. Ūsuyari opāa. Siuñajārī merā āārīrikua. Gajerā marīrē ñerō irikerepuru, ĩgūsā merā guabea. Masakare bopoñarī merā ĩāa. ĩgūsārē oārō gūñari merā iritumua. Piriro marīrō Marīpu gāāmerōsū gajerārē keoro oārō yāa. ²³“Gajerā nemorō āārā”, ārī péñabea. Marī ñerī uaribejarire iridukerera, iribe. Ōāgū deyomarīgūyare irirā, irasūta yāa. Gajigu irasirirānorē: “Irire irasiribirikōāka!” neō āārībemi. ²⁴Marī Jesucristoyarā āārīsīā, marī ñerī uaribejarire piribu. Irasirirā marī gāāmerirē, marī ñerō iriduarire iribe. ²⁵Marī, Ōāgū deyomarīgū iritamurī merā Marīpu merā oārō āārīrikua. Irasirirā Ōāgū deyomarīgū marīrē iridorerire ĩgū iritamurī merā irinikōārō gāāmea.

²⁶Irasirirā marī: “Gajerā nemorō āārā”, āārībirikōārā! Marī werenírī merā gajerārē gāme ĩaturimakū iribirikōārā! Gajerā oārō āārīrikurire ĩaturibirikōāka!

Pablo: “Musā Jesucristore buremurā gāme iritamuka!” ārī gojadesa

6 ¹Yaarā, sugu Jesúre buremuğū ñerirē irimakū ĩārā, musā Ōāgū deyomarīgū iridorerire irirā ĩgūrē iritamuka, ĩgū iri ñerō iririre piriburo,

ārīrā! “Gua, īgū nemorō āārā”, āri gūñarō marīrō oārō merā īgūrē wereka! Irasū iritamurā, oārō pémasīka, musāde īgū irirosūta ñerīrē iriri, ārīrā! ²Musā bujawererānorē, gūñaturamerānorē, ñerī űaribejarire tarinűgāmasīmerānorē iritamuka! Musā irasū iritamurā, Jesucristo dorederosūta irirākoa.

³Sugū oārīrē iribirikeregu: “Yū oārīrē irigū āārā”, āri gūñagū, īgū basi āriगतogū yāmi. ⁴Marī masakaku: “ĴOārō irigū yāri?” ārīrā, marī basi marī iririre pémasīri merā gūñarō gāāmea. Irasiridero pűű, marī iriri oārī āārīmakū: “Gajerā nemorō āārā”, āri gūñarō marīrō űűyari merā: “Yū oārīrē yāa”, āri masīrākoa. ⁵Irasirirā marī masakakū, Marīpű iūrō īgū: “Yaare irirā, āsū irika!” āri pīdeare oārō iriro gāāmea.

⁶Musā Jesúya kerere buerimasārē iritamuka! Īgūsā musārē bueri waja, musā oārī oparire īgūsārē dukawaka, īgūsā gāāmerīrē opaburo, ārīrā!

⁷Musā basi āriगतobirikōāka! Marīpűre gopeyari marīrō merā: “Yū ñerō irimakū, yűre wajamoābirikumi”, āri gūñabirikōāka! Marī oārī oterā, pűűgűe oārī dukare bokarosū marī oārī irirā, pűűgűe oārīrē bokarākoa. Ñerīrē irirā, pűűgűe ñerīrē bokarākoa. ⁸Sugū īgū ñerī űaribejarire irinīgūno, īgū ñerī iridea waja ñerīrē bokagukumi. Prebiri peamegűe wajamoāűűgukumi. Oāgū deyomarīgū gāāmerīrē irigū gapű oārīrē bokagukumi. Marīpű pűro prebiri okari opagukumi. ⁹Irasirirā Oāgū deyomarīgū gāāmerōsū gariborero marīrō oārīrē irinīkōārā! Marīpű iridűarinű ejamakū, marīrē oārī iririre pirimerārē oārīrē sīgukumi. ¹⁰Irasirirā noó waarō āārīpererā marī bokajarānorē oārīrē irirā! Marīyarārē Jesucristore bűremurārē neó piriro marīrō īgūsārē oārīrē irinīkōārā!

Pablo weretūnudea

¹¹Īāka! Yū basi musārē ire gojadűakoa. Irasirigū i pagari gojari merā musārē āsū āri gojagű yāa. ¹²Īgūsā musārē dupűma gasirogārē wiiridorerimasā,

īgūsārē gajerā judío masaka oārō gūñamakū gāāmerā, irasū wiiridorema. Marī Jesucristo īgū curusague boadea merā masakare tauri kerere bueri waja judío masaka marīrē turi, ñerō yāma. Musārē dupűma gasirogārē wiiridorerimasā gapű gajerā īgūsārē turi, ñerō irimakū gāāmemerā, musārē irasū wiiridorema. ¹³Īgūsā īgūsāya dupűma gasirogārē wiirisūnerā āārīkererā, āārīpereri Moisés doredeare iripeobema. Iri dorerire iripeobirikererā, gajerā judío masaka péuro: “Gua Moisés doredeare iridoremakū, Galacia marā, gua iridorederosūta irima”, āridűarā, musārē irasū wiiridorema.

¹⁴Yū tamerā īgūsā irirosū irasū ārīrīrē gajerā péuro neó āribirikoā. Marī Opű Jesucristo īgū curusague boari merā marī ñerō iridea wajare wajaribosadea kere direta masakare weregukoa. Jesucristo yűre yű ñerō iridea wajare taudi āārīmakū, i űműma ñerī űaribejari iririre piribű. I űmű marā yűre īgūsā irirosū ñerī űaribejarire iridoremakū, neó iribea. ¹⁵Irasiriro, marī Jesucristoyarā āārīmakū, Marīpű iūrō dupűma gasirogārē wiirisūnerā āārīrī, wiirisūbirinerā āārīrīde wajamāa. Marī Jesucristoyarā ñajāmakū, Marīpű marīrē maama āārīrikurire opamakū iridi āārīmī. Iri maama āārīrikurire opari dita wajakűa. ¹⁶Marīpű āārīpererārē yű Jesucristoyare buerire iritűyarārē bopoñari merā iā, siuñajārī merā āārīrikumakū iriburo. Marīpű āārīpererārē īgűyarārē irasiriburo.

¹⁷Yū Jesucristoyare buedeā waja gajerā yűre pá, yaa dupűre kāmītű, ñerō tarimakū irima. Īgūsā irasiridea merā yű Jesucristore moāboegű āārīrīrē masīsűa. Irasirirā dapora merā neó sugű yűre garibonemobirikōāburo. Yű buerire: “Diaye āārībea”, āri, yűre ñerō werenīnemobirikōāburo.

¹⁸Yaarā, marī Opű Jesucristo musārē āārīpererārē oārō iriburo. Irasūta iriburo.

Iropāta āārā.
Pablo